

8-§. Asosiy vositalarning chiqib ketishi

50. Asosiy vositalar qiymati chiqib ketishda balansdan hisobdan chiqarilishi lozim.

51. Asosiy vositalar qiymati korxona balansidan quyidagilar natijasida hisobdan chiqariladi:

tugatilganda;

sotilganda

ayirboshlanganda;

tekinga berilganda;

ustav kapitaliga ta'sischi ulushi sifatida berilganda;

moliyaviy ijara (lizing) shartnomasi bo'yicha berilganda;

kamomad yoki yo'qotishlar aniqlanganda;

ta'sischi ta'sischilar tarkibidan chiqqanda;

nodavlat notijorat tashkilot mulkini shakllantirishda mulkiy badal sifatida berilganda.

52. Asosiy vositalar qisman tugatilgan holatda uning boshlang'ich (qayta tiklash) qiymati va jamg'arilgan amortizatsiyasi mos ravishda ob'yektning tugatilgan qismining boshlang'ich (qayta tiklash) qiymati va jamg'arilgan amortizatsiyasi summasiga kamaytiriladi.

53. Asosiy vositalarning chiqib ketishidan moliyaviy natija (foyda yoki zarar) asosiy vositalarni chiqib ketishidan daromaddan ularning qoldiq (balans) qiymati, asosiy vositalarning chiqib ketishi bilan bog'liq bilvosita soliqlar va xarajatlarni ayirish orqali aniqlanadi.

Asosiy vositalarning chiqib ketishidan moliyaviy natijani (foydani yoki zararni) aniqlashda asosiy vositalarning ilgarigi qayta baholashdagi bahosini o'sishi summasi, ya'ni ushbu asosiy vositalarning ilgarigi bahosini o'sishi summalarining ilgarigi bahosini pasayishi

summasidan ortgan qismi asosiy vositalarning chiqib ketishidan daromad tarkibiga kiritiladi va bir vaqtning o'zida «Uzoq muddatli aktivlarni qayta baholash bo'yicha tuzatishlar» schyoti bo'yicha rezerv kapital kamayadi.